

三國志通俗演義

卷之六

1242.4

1

三國志通俗演義卷之六

目錄

雲長延津誅文醜

關雲長封金掛印

關雲長千里獨行

關雲長五關斬將

雲長擂鼓斬蔡陽

劉玄德古城聚義

孫策怒斬于神仙

孫權領衆據江東

曹操官渡戰袁紹

曹操烏巢燒糧草

三國志通俗演義卷之六

晉平陽侯陳壽史傳

後學羅本貫中編次

雲長延津誅文醜

却說關公匹馬斬了顏良。敗軍奔回。報知袁紹。紹大怒。欲斬玄德。玄德面不改容。而言曰。明公只聽一面之詞。而自絕向日之情耶。且劉備自徐州失散。老小皆棄。未知雲長在否。天下有多少同姓同貌者。豈特赤面使大刀。

即關某也。明公何不詳之。袁紹是箇沒主張的人。聞玄德之言。責沮授曰。誤聽汝言。險殺愛弟。遂請劉玄德上帳坐。却議報顏良之讐。帳下一人。應聲而言曰。顏良是吾弟也。既被曹賊所殺。吾安得不雪其恨乎。玄德視其人。身長八尺。面如鰲豸。山後人也。姓文。名醜。乃河北名將。袁紹大喜曰。非汝不能報顏良之讐也。吾亦與你兵馬十萬。即便起行。令醜直渡黃河。追殺操賊。沮授曰。行兵之要。勝負變

化。不可不詳。今兵宜留屯延津。分兵官渡。若其克獲。還迎不晚。今輕舉渡河。設有其難。衆皆不可還矣。紹怒曰。皆是汝等遲慢軍心。遷延歲月。有妨大事。豈不聞兵貴神速乎。沮授出。嘆曰。上盈其志。不務其功。悠悠黃河。吾其濟矣。遂托疾不出議事。玄德曰。今劉備久蒙大恩。無可報效。欲助文將軍同行。一者報明公之德。二者就探雲長的實。紹喜。喚文醜與玄德同領前部。文醜曰。劉玄德乃累敗之將。

於軍不利。文醜乞自去。不用玄德。紹曰。吾欲見玄德才能。汝可同去。文醜曰。既主公要此人去時。某分三萬軍。教他為後部。如其無功。可自治罪。玄德曰。分兵最好。文醜遂自領七萬軍先行。玄德引三萬隨後便起。却說曹操為雲長斬了顏良。倍加欽敬。表奏朝廷。封雲長為壽亭侯。鑄印送與關公。印文曰。壽亭侯印。使張遼齎去。關公看了。推辭不受。遼曰。據兄之功。封侯何多。公曰。功微。不堪領此名爵。

再三辭却。遼齎印回見曹公。說雲長推辭不受。操曰。曾看印否。遼曰。雲長見印來。操曰。吾失計較也。遂教銷印匠。銷去字。別鑄印文六字。漢壽亭侯之印。再使張遼送去。公視之。笑曰。丞相知吾意也。遂拜受之。忽聞人報。袁紹又使大將文醜。渡黃河。已據延津之上。操先使人移徙居民於西河。操自領兵迎之。三軍皆起。軍馬在前。糧草在後。操傳令。教糧草車仗盡行前去。後軍作前部先鋒。護守糧草。以

前部先鋒却居於後。呂虔曰。糧草在前。而兵在後。何意也。操曰。糧草在後。多被標掠。吾故令在前也。虔曰。倘遇敵軍。守糧者。又不敢戰。必誤大事。操曰。吾待敵軍到時。却又理會。虔疑。不敢再言。操令糧食輜重。沿河塹至延津。操在後軍。聽得前軍發喊。急差人看時。人報河北大將文醜兵至。我軍皆棄糧草。俱被趕散。後軍又遠。將如之何。衆人商議。要退守白馬。操教退軍河北。又斷其路。軍皆散亂。操以

鞭指南阜可避。

阜土山也。

人馬急奔土岸。操令人

馬皆解衣卸甲。少歇。盡放其馬。文醜軍掩至。

衆將曰。賊至柰何。可急收馬匹。退回白馬。一

人急止之曰。此正可與賊交戰之處。何退之

耶。操視之。乃荀攸也。操急以目視攸而笑。攸

知其意而不復言。文醜軍既得車仗。又來搶

馬。軍士不依隊伍。自相離亂。原來過此。只顧

取物。無心廝殺。曹操人馬圍裹將來。文醜挺

身獨戰。軍士自相踐踏。文醜止遏不住。撥回

馬走。操在土岸上指曰。文醜乃河北名將。誰可擒之。二將飛馬而出。操視之。廼張遼。徐晃也。二將追趕文醜至近。大叫賊將休走。文醜回頭。見二將趕來。遂按住鐵鎗。拈弓搭箭。正射張遼。徐晃大叫。賊休放箭。張遼低頭急躲。一箭中遼頭盔。將簪纓射去。遼奮怒再趕。坐下馬又被文醜射中面頰。戰馬跪倒前蹄。張遼落地。文醜策馬前來。徐晃急輪大斧。截住廝殺。二將戰三十餘合。張遼去遠。徐晃見

文醜後面軍馬齊到。先撥回馬走。文醜沿河
趕來。忽見十餘騎軍馬。旗號翩翻。一將當頭。
提刀出馬而來。乃漢壽亭侯關雲長也。大喝
一聲。賊將休走。與文醜交馬。戰二合。文醜心
怯。撥回馬遶河而走。關公馬是千里龍駒。早
趕上文醜。腦後一刀。將文醜斬下馬來。後有
詩讚關公誅文醜。詩曰

誓把功勲建。須將恩義酬。奮身誅虎豹。用
命統貔貅。白馬顏良死。延津文醜休。英雄

誰可似。不負壽亭侯

曹操在土鼻上。見關公刀砍文醜。大驅四下人馬掩殺。河北軍皆落水。復奪輜重馬匹車仗。雲長引數騎耀武揚威。東衝西突。正殺之間。劉玄德領三萬軍隨後到。前馬哨知。報與玄德曰。今番又是紅面長髯的斬了文醜。玄德聞之。慌忙驟馬來看。隔河望見一簇人馬如飛。衆皆指曰。此正是也。玄德遙見征塵中一面旗。上寫着漢壽亭侯關雲長七箇字。玄

德暗謝天地。曰。原來我兄弟。果在曹操處。欲去相見。被曹兵勢大擁來。只得收敗殘軍馬回去。袁紹接應至官渡。下定寨柵。有郭圖審配。入見袁紹。說今番文醜。又是關某壞了。劉備佯推不知。袁紹大怒。罵曰。大耳賊焉敢如此。人報玄德至。紹令推轉斬之。玄德曰。某有何罪。紹曰。你故使關公。又壞吾一員大將。玄德聞之。笑曰。明公不知。容伸一言而死。今曹操素恩劉備。備雖一時潰散。必有復讐之日。

今知備在明公處。恐其協力攻曹。故特使關
某誅殺二將。公知必怒。不肯助兵。此乃借明
公之手。而殺劉備。斷絕讐人。以除後患。願明
公思之。

此是玄德
極象雄處

袁紹曰。玄德之言是也。汝

等使我受害賢之惡名耳。喝退左右。請玄德
上帳而坐。玄德謝曰。感荷明公寬大之恩。無
可補報。欲令一心腹人。持一密書去見雲長。
使知備消息。必星夜來到。輔佐明公。共誅曹
操。以雪顏良文醜之恨。若何。袁紹大喜曰。吾

若得雲長。似顏良文醜復生也。商議脩書。未

有人去。紹令退軍于陽武。

地名。

結營。連絡數十

里。按兵不動。操亦令夏侯惇總兵。守官渡隘口。操班師回許都。大宴衆官。賀雲長之功。席上曹與呂虔曰。昔日吾以糧草在前。乃餌敵之計也。惟荀公達知吾心耳。衆皆服其論。正飲宴間。忽報汝南有黃巾劉辟龔都。甚是猖獗。曹洪累戰不利。乞撥勇將精兵救之。雲長聞言。乃進前曰。關某願施犬馬之勞。去破汝

南賊寇。操曰。雲長建立大功。未曾重賞。何勞又征進耶。公答曰。關某久閑。必生疾病。願再一行。曹操許之。點軍五萬。使于禁樂進為副將。次日便行。荀彧曰。雲長常有歸劉之心。倘知消息。必去。不可令頻出軍。操曰。今次收功。吾再不教臨敵矣。雲長領兵往汝南進發。敵軍相迎。扎住營寨。當夜營外掣了兩箇細作。人來。雲長視之。內中認的一人。曰。此處起直教兄弟再得聚會。畢竟此人是誰。